



wantok

Niuspepa bilong ol Papua Niugini stret

NESENEL

Namba 243

Bilong wik i stat long Sarere, 4 Novemba 1978

Prais 10t.



Poto i soim nupela Katolik bisop bilong ol Simbu, em Bisop Raymond Caesar, S.V.D. Em i wanpela blakskin bilong Amerika na i bin wok long PNG inap 16 yia pinis.

Bisop Caesar bai helpim Bisop John Cohill, S.V.D., bilong Goroka. Olsem na Bisop Cohill na Asbisop Adolf Noser, S.V.D., bipo em i bisop bilong Madang, na Asbisop Herman ToPai-vu bilong Port Moresby i bin givim pawa bilong bisop long Pater Caesar. Samting olsem 12 arapela Katolik bisop tu i stap. Na dispela seremoni ol i mekim long Mingende, em i namba wan misin stesin bilong ol Katolik long Simbu na ol i bin opim long yia 1934, taim Hailans i op namba wan taim.

Bikpela lain Simbu, inap long 8000 samting i insait long dispela lotu.

Tupela blakskin pater bilong Amerika bipo i skul wantaim Bisop Caesar tu i kam. Na tupela meri: wanpela i tisa bilong em bipo na narapela i smolmama.

Bisop Caesar i gat 46 krismas. Long 1962 em i kam wok long Kap semineri klostu long Madang. Bihain em i wok long Boman inap 1971. Nau em i go long Goroka na wok olsem tisa na dairekta bilong olgeta Katolik studen long Goroka Tisa Koles.

Long poto olgeta manmeri i lukluk i go antap bikos wanpela helikopta i bin kam kisim poto.

Sista Norbertine Ryk, OLSH i bin kisim dispela poto.

NUPELA SIMBU BISOP

SIMBU WOKIM NUPELA BISOP

Kirap long lephan daunbilo yumi ken lukim Asbisop Adolf Noser (bipo em i bisop bilong Madang tasol em i sevis nau), na Bisop Caesar, na Bisop John Cohill bilong Goroka, na Asbisop Herman ToPaivu long Port Moresby.

Long raithan yu ken lukim liklik hap tasol bilong draipela lain pipel i bin kam lukim namba wan Katolik bisop bilong ol Simbu stret. Em i mekim hetkota bilong em pinis long Kundiawa.



Poto long daunbilo i soim Bisop Caesar wantaim tupela wasmama bilong em. Meri i putim han long sol bilong em em i Misis Edith Stevens (smolmama bilong em). Na napela ya em i Misis Helena Patten (tisa bilong em long praimer skul yet). Nau tupela i wasmama bilong Bisop Caesar, long wanem papamama bilong em indai pinis.

Olgeta poto long dispela pes i kam long Luke Longpsael.



wantok
Newspaper talking of Peoples Peoples street

**National weekly in
 Melanesian Pidgin.**

Editorial Offices:
 P.O. Box 1982
 Boroko

Phone: 25.2214
 25.2552
 Telex: NE 22213

Branch Offices:
 Wewak
 Phone: 86.2479

Wabag
 P.O. Box 111
 Phone: 57.1018

Advertising:
 In P.N.G.
 Penny Donald
 Phone: 25.2214

In Australia:
 Peter Halse Associates
 King York House
 32 York Street
 Sydney (2000)
 Phone: 29.7527
 Telex: 21.409

Subscription Rate:
 Annual: K8.00.



Arapela wik i gat wanpela bikpela kibung long Port Moresby na samting olsem 200 bikpela saveman bilong olkain dipatmen bilong gavman i bung na paitim toktok, inap wan de stret.

As tingting bilong dispela kibung em i dispela: Yu ting em i bikpela samting long autim gut olkain tok save long ol pipel bilong PNG?

Sampela man i makim NBC, na sampela i bilong P en T, na sampela i bilong ol laibreri, na sampela bilong opis bilong tok save o infomesen, sampela i bilong viles developmen. Olgeta ol i gat wanpela wari na i laik skul moa moa yet long wanpela samting: olsem wanem yumi ken skulim tru ol as ples pipel na givim gutpela save long ol na autim tru tok save long ol?

Sampela i soim piksa, sampela i soim muvi, sampela i tok long redio, sampela i raitim buk na niuspepa, sampela i sindaun toktok stret long ol pipel long ples. Ol dispela savemanmeri i bin mekim planti toktok na autim planti wari na hevi bilong ol na bilong dipatmen bilong ol.

Mipela ol man bilong Wantok Niuspepa, mipela tu i stap long dispela miting. Na mipela i wet i wet longpela taim inap ol bai toktok long dispela samting: yumi mas yusim WANEM TOK PLES bilong givim save long ol manmeri long as ples? Long program ol i putim dispela tok long kamap las tru. I luk olsem em i samting nating, na em i orait, em i ken kamap bihain. Na mipela i kalap nogut tru long lukim, dispela toktok i lus olgeta, i no kamap olgeta long program. Ol bikpela tisa bilong yunivesiti na bilong edukesen dipatmen na bilong Pos Kuria, ol i mas kamap stiaim toktok na tingting bilong dispela samting, ol i no kamap olgeta.

Mipela bilong Wantok i lukim dispela na mipela i belhat. Mipela i pilim olsem: planti dispela bikpela saveman i popaia long wok bilong ol, BIKOS OL I NO YUSIM WANPELA WOK PLES OL PIPEL I KEN HARIM. Em tasol. Man i yusim tok Inglis long kamap long ol as ples, em i longlong olgeta.

Tasol tru tumas tude yet i gat planti manmeri tumas long ol bikopis bilong gavman ol i ting tok Inglis, em tasol i tok ples bilong Papua Niugini. Ol i aipas; ol i yaupas. Ol i olsem muruk i haitim het aninit long graun na i ting ol man i no ken lukim em nau bikos em i no lukim ol.

Ol dispela savemanmeri long kibung i bin tok strong, na paitim tok, na i belhat, na i kros, na i no malolo liklik long sutim tok na sutim pinga long sampela dipatmen bilong gavman. Long tingting bilong mipela ol bin wok olsem planti mekenik i bung long stretim wanpela ka i no bin ran gut. Wanpela i stretim ensin, wanpela i stretim bateri, wanpela i stretim hon, nara-pela i stretim tang bensin. Tasol bihain long ol dispela wok, ka i no inap ran. Bilong wanem? Ol i lusim ting long putim wil long ka.

Tok ples bilong ol pipel, tok ples ol pipel i save harim. . . . em i olsem wil bilong ka. Sapos em i no stap o em i no stret, maski long olgeta arapela hap bilong ka.

SIOS KAUNSILO SOIM ROT

Sios Kaunsil bilong Melanesia i bin kibung long Lae inap wan wik stret, na 32 tokman bilong 7-pela memba sios na 11-pela arapela sios i bin kam, na olgeta ol i bin paitim tok long ol bikpela wari bilong kantri.

Ol i bin autim aidia bilong ol long: strongpela dring, ol buk na muvi nogut i gat sem, ol sios wokman i kam long ol ausait kantri, ol Wes Irian pasindia pipel, na wok lida bilong ol meri.

Ol deliget i save pinis, wan wan het tok ya i bikpela wari tru long kantri. Hia mipela i givim sampela aidia bilong ol long ol dispela wan wan samting.

STRONGPELA DRING:

Olgeta manmeri i save pinis, strongpela dring i bikpela wari na i as bilong planti trabel moa long PNG. Strongpela dring na pasin spak i bin senisim laip na pasin bilong planti pipel na planti viles na planti lain na planti ples pinis. Em i bagarapim ol tasol.

Long yia i go pinis, Minista bilong bosim strongpela dring, Misis Nahau Rooney, i bin askim ol sios long nem bilong gavman long wokim wanpela program bilong skulim ol pipel long ol samting nogut i save kam long strongpela dring. Gavman i laik bai ol saveman bilong sios i wokim buk na piksa na muvi na pilai long redio na olgeta kain samting olsem.

Gavman i pilim, ol sios i gat gutpela save na laik na strong long skulim ol pipel gut long ol wari bilong strongpela dring. I no gat wanpela dipatmen bilong gavman inap long mekim dispela kain tok na wok inap long ol sios.

RAUSIM BUK NOGUT:

Dipatmen bilong Foren Afeas na Tret aninit long Mista Ebia Olewale, i bin makim wanpela lain spesel pipel long glasim na skelim gut olkain film na buk na piksa i kam insait long kantri. Ol i mas tambuim olkain samting ol pipel i sem long lukim na i bagarapim tingting bilong ol yangpela pipel. Wanpela memba bilong Sios Kaunsil bilong Melanesia (em Pater Dick Avi) i stap long dispela komiti.

Sampela deliget long miting i ting, mobeta wan

wan provins i gat wanpela dispela kain komiti bilong em stret. Ol pipel long wan wan provins i narakain, na komiti i mas tambuim olkain samting ol pipel yet long dispela hap i sem long lukim na harim. Na tu olkain samting i givim aidia nogut long ol yangpela pipel.

OL SIOS WOKMAN:

Miting i wari tru long sampela man i kam long ol ausait kantri long wok wantaim ol sios, tasol bihain ol i go mekim narakain wok. Kibung i ting ol sios hia yet i mas singat long ol dispela kain wokman, na i mas save bipotaim ol i laik mekim wanem wok tru. Ol i no ken kam nating.

Long sampela hap ol dispela ausaitman i kam na statim liklik sios bilong ol yet. Ol i bungim sampela memba em ol i bin pulim tasol long ol arapela sios.

Olsem na ol i brukbrukim wok bilong God na gutpela sindaun long kantri.

Tude i gat planti nupela sios i kirap na wanpela man tasol i bosim. Ol bikpela sios i no laikim dispela kain pasin. Ol i laikim bai i mas gat 10-pela lokal wokman bilong sios bilong olgeta wan wan ausaitman.

OL PASINDIA BILONG

IRIAN JAYA: Ol sios i pilim ol i mas mekim sampela wok bilong helpim ol Irian Jaya i ranawe i kam long PNG long wanem i gat pait long ples bilong ol na ol i pret.

Pasto Joshua Daimoi, em hetman bilong Sios Kaunsil bilong Melanesia, i tok save olsem: ol sios i stap klostu long mak namel long Irian Jaya na PNG ol i wok nau long helpim ol pasindia long haus na kaikai na marasin. Tasol em i pilim olgeta arapela sios i mas bungim mani long helpim dispela kain wok, em i wok tru bilong ol Kristen.

WOK LIDA BILONG OL

MERI: Dispela kibung i wantingting long dispela aidia: moa meri i mas kamap lida. Yunaitet Sios yet i bin autim dispela toktok long wanem em i bin ranim wanpela spesel skul long trenim ol meri i kamap lida. Ol i bin mekim dispela long Malmaluan klostu long Rabaul. Ol i laik bai olgeta sios i insait long dispela kain wok.

Long dispela we olgeta sios i save strongim bel na tingting bilong ol meri long ol taun na ol as ples.

Ol meri i mas soim rot bilong bung wok wantaim long helpim ol pipel nabaut long ol.

Sios Kaunsil bilong Melanesia bai helpim dispela skul na tu ol i wetim sampela helpim bilong ol sios bilong ol ausait kantri. Ol i ting Rabaul em i gutpela ples bilong kain skul olsem, long wanem hia kaikai i no kostim planti mani na olkain gutpela samting bilong mekim skul i stap pinis. Kain kos olsem bilong trenim ol meri bai ran inap 4 wik 4 wik.

PAS I KAM LONG OL PIPEL

MERI POLITIK

Dia Edita - Mi laik autim wari bilong mi olsem. Mi lukim planti ol meri ol i politik ol i no olsem man tasol pilai politik bilong ol i moa yet. Ol dispela ol meri ol i bilong Enga yet. Tasol politik bilong ol i moa yet.

Sapos man bilong em i bos, orait, em meri i go antap olgeta. Em i no stret Yu meri, yu aninit long man bilong yu. Sapos yu i gat sampela tingting na yu mekim em orait. Tasol nogat. Wanpela samting long et tru na nogut.

Wabon Ibara,
Laiagam/Enga.

INAP EKS STUDEN HELPIM?

Dia Edita - Plis inap yupela givim liklik spes long mi bilong mi ken autim wari bilong mi long ol eks studen bilong St. Johns Semineri long Is Sepik na tu long arapela hap bilong kantri.

Yes ol wantok, olsem wanem yupela i lusim tingting pinis long olupela skul bilong yu we yu bin kisim sampela save long en bipo. Ating nogat, long wanem sapos wanpela bosman bilong wok o husat i askim yu long skul em yu bin stap long en bai yu inap tingim gen dispela skul.

Olsem tasol ol wantok, yumi save olsem kain singaut bilong God long bihainim em olsem wanpela pris o bruder i no save kamap long yumi olgeta. Nogat. Wan wan tasol bilong yumi i save strong na kisim dispela wok bikpela i laik long en.

Long dispela sampela bilong yumi i save go aut na kisim wok yumi gat laik long en. Arapela taim tu olsem yumi yet i bikhet liklik na ol bosman bilong skul i save rausim yumi. Tasol mabeti yumi no ken wari tumas long dispela samting.

Mi yet mi ting i moa gut sapos yumi tingting bek long seminari, long ol tisa bilong yumi, ol wan semi-

narien bilong yumi na tu long bikpela save, taim na hatwok ol tisa i bin mekim long yumi long en. Sapos yumi tingting stret na wari long ol dispela samting, orait i gutpela sapos yumi inap long bekim na helpim seminari bilong yumi long sampela kain we.

Yumi save tu olsem dispela kain skul gavman i no save helpim, olsem na mi askim helpim bilong yupela ol eks studen.

Sampela i stap long ples sampela i kisim wok long taun i tru, tasol long ples tu yumi ken helpim long givim sampela gutpela save bilong yumi long stretim sindaun na tingting bilong ol pipel long ples. Na long taun ating yumi ken givim liklik mani o samting olsem long mekim go het seminari bilong yumi.

Long dispela mi no askim long bikpela mani, nogat. Ating K2 kina o K1 kina, em bai inap tasol. Sapos yu wari na tingting long olupela skul bilong yu.

Sapos yumi ting yumi independen, orait bai yumi yet mas givim sapot long ol seminari bilong yumi na bai ol i ken kamapim planti wokman bilong holim wok bilong sios. Planti taim mani i save kam long arapela kantri na ausait tasol. Em i no gutpela piksa long soim yumi independen.

Yes ol brata eks seminarians i gutpela yumi tingting long dispela samting na traim long helpim. Yumi no ken westim taim tumas long wanem bihain bai no gat man o kantri bai helpim yumi. Na em dispela wari bilong mi olsem mi autim long yupela ol eks seminarian.

Jack Link,
Kairiru Ailan/Wewak.

KATEKIS TOKAUT

Dia Edita - Mi laik autim sampela wari bilong mi i go olsem. Independens em i bilong ol gavman tasol. Nating sios i no kisim Independens. Sori ol pater yupela i tingting wanem long planti katekis i lusim wok katekis. Mi ken tokim yupela wanwok bilong mi ol pater. Planti taim mi-

pela i go long kos o mipela ritrit mipela katekis tasol mipela save bung na mipela toktok long mani.

Wanem taim ol pater i apim mani bilong mipela go antap? Na planti katekis i gat wari long mani na lusim wok katekis. Tru mipela save mipela katekis i no wok mani. Tasol long laip bilong bodi bilong yumi tu i ken sindaun gut na amamas na autim Gutnius bilong Jisas Kraus long ol pipel.

Nating tok bilong mi i karim kaikai sapos wanpela katekis o pater i ritim dispela, yu belhat, orait, rait tasol long Wantok Niuspepa na mi lukim.

K. Kosmas,
Banara/Madang.

Salim ol pas
i kam long:

WANTOK
BOX 1982
BOROKO

TOK PISIN SAIN

Dia Edita - Hia mi gat wari olsem. Tingting bilong mi i olsem, bilong wanem na ol plis trafik bilong yumi long PNG ol i no laik senisim ol kain kain sain long rot o long siti, taun bilong PNG. Na putim olsem long tok pisin tok save daunbilo ol raitim long tok inglis. Long wanem tingting bilong mi, mi pilim bikpela bun tok ples bilong yumi long PNG em tok Pisin i go pas.

Na olgeta taim mi lukim yumi sanap long lek bilong yumi tasol dispela sain o tok save bilong trafik, em i stap yet long tok inglis. Na i luk olsem yumi PNG i no gat wanpela tok ples i bungim yumi olsem inglis tasol.

Tingting bilong mi i strong tru long dispela mas namba wan samting tok pisin i go pas long ol dispela kain liklik samting em i orait. Sampela kantri ol i kam ol i ken lukim na klia o dispela em long tok ples bilong kantri yet PNG. Na daunbilo em inglis toktok save bilong trafik lo bilong

ol. Ating dispela kain tingting bai planti bilong PNG manmeri, mipela bai i amamas tru.

Em tasol liklik wari bilong mi. Tenkyu.

Mista Zappu Penga,
Finschhafen/Morobe

MISIN HAUS SIK

Dia Edita - Mi laik askim wanpela tok long ol gavman. Askim i go olsem wari bilong mi i go olsem. Bilong wanem yupela ol gavman i no orait long ol misin i ken putim haus sik long stesin i klostu long ol. Ol kaunsil i save karim dispela wari i go long miting. Tasol ol gavman i no orait long ol i ken wokim haus sik, bilong wanem yupela pasim dispela rot. Mi askim long en, em i olsem:

Planti manmeri ol i kam long misin stesin na askim marasin long stesin. Tasol ol misin i save tok, ol gavman i no orait na mi no inap givim marasin long yupela. Em i tokim ol manmeri olsem na em i salim ol i go bek long ples.

Na planti ol i save i go i dai. Na sampela ol i save painim p.m.v. na westim mani bilong ol na ol i go long haus sik. Em ol i save mekim olsem na mi askim yupela. Inap salim haus sik long misin stesin o wanem?

Mi wari long ol pipel bilong mi. Baibel i save tok: "Jisas wanpela tasol i save oraitim ol sik man." Na yumi beten na givim marasin em ol inap orait. Bikpela i save tok. "Mi bikpela dokta long heven. Beten pastaim na bai i orait."

Sapos husat i laik bekim pas bilong mi, orait, rait tasol i go long Wantok Niuspepa.

Tomas Lainya Kongai,
Warababe/S.H.P.

VANIMO TOKBEK

Dia Edita - Mi laik bekim pas bilong brata hia C.N. Lemson long Madang, long Wantok bilong Sarere, 16 Septemba 1978, "Vanimo man amamas."

Nau mi autim ol tingting i go aut long dispela brata

hia C.N. Lemson. Yes, em nau em i go het na tok olsem em i wanpela pes greduet bilong Aitape Haiskul insait long yia 1971-1974 na i tok olsem em yet wantaim sampela skul boi i wok hat tru long kamapim dispela haiskul i kamap gutpela inap nau.

Orait nau, brata em i gutpela long ol toktok em yu bin raitim tasol long narapela sait em yu no ken tok baksait olsem long ol helpim bilong ol man meri long dispela ples. Yes mi tokim yu olsem, yu kam long skul na yu baim skul fi mani orait em nau yu no ting olsem i no gat kaikai em yu baim. Orait, i mas i gat kaikai; na yu kam long kisim save tasol.

Na tu yu no ken tok bilas nating. I gutpela bai yu ken kam bek na lukim ol samting i save kamap long Vanimo.

M.A. Rick, "Bakuk".
Vanimo/Wes Sepik

BRATA MARITIM SUSA

Dia Edita - Inap yu larim liklik spes long mi na bai mi i ken toktok liklik long stretim dispela wari bilong Lucily Anton i bin raitim i i go long Wantok Nius. Lucily taim mi ritim pas yu salim long Wantok long het tok "Brata maritim susa". Stet we mi bin kisim tingting olsem. Ating em i pinis bilong dispela graun nau olsem na ol man na meri het i longlong nau na ol i laik wokim kain kain pasin.

Tu long dispela mi ting olsem gen ating dispela man i bin kaikai hap mit bilong dok pinis olsem na laik kisim pasin bilong dok. Ol dok em ol narapela kain enimet tru bilong wanem ol i no save kaunim mama dok o maski papa dok. Nogat. Ol bilong givim nating tasol.

Long yumi ol man papa antap i givim tingting o putim kru insait long het long yusim long luk save long famili, pren na ol samting olsem na planti moa. Lucily Anton mi, tingting olsem yu mas rait long dispela man na tok save long rait na kisim moa skul long "Laip Lain".

Raymond, Lae.

NIUS I KAM LONG PROVINS

Is Sepik

Ol Wewak ailan no go het

Dia Edita - Inap long yu-pela ken givim mi hap spes na mi laik putim aut tingting bilong mi. Dispela em i namba wan taim bilong mi long givim kain tingting bilong mi i go long yupela na putim long Wantok Niuspepa bilong yumi PNG.

Mi rait na toktok long ol pipel bilong ol dispela ol Wewak Ailan. Ol ailan em stat long Vokeo, Koil, Wei, Kadavar, Rubrub, na Bam Ailan. Dispela ol ailan ol i bung wantaim long Wewak-But Kaunsil na ol i no save kisim sampela helpim tumas long Wewak-But Kaunsil. Tarangu ol i save lusim nating ol takis mani long kaunsil.

Wari bilong mi long dispela, bikos olgeta yia mi save go lip long ples na mi save raun long olgeta ailan na mi save lukim olsem, ol dispela ol ailan i no save senis liklik. Ol ailan i stap olsem bipo taim mi stap long praimer skul na haiskul na nau mi kisim wok na ol ailan i no senis yet. Ol senis em taim mi stap long skul long ples na mi lukim em. Wanpela haus sik long Vokeo, ol hul wara long Koil na Walis, long Wei ailan nogat, Kadavar ailan nogat, Rubrub ailan etpos na Bam ailan nogat senis.

Long tingting na wari bilong mi nau, mi laik autim long yu husat man o meri bilong ol dispela lain ailan. Sapos yu stap long Mosbi, Lai, Alotau, Popondetta, Madang, Goroka o wanem hap bilong PNG. Mi laik yupela mas helpim na strongim dispela tingting wari bilong mi na helpim ol ailan bilong yumi.

Nau mi tingting olsem nating em i gutpela yumi ol dispela ol ailan yumi mas bruk long Wewak-But Kaunsil. Bikos yumi ken mekim wanpela kaunsil bilong yumi yet. Mi pilim long dispela em i nogut liklik long wok anitnit long kaunsil i gat bikipela

eria o mak long lukautim. Toktok long kaunsil bilong yumi yet, bikos mi ting nating long namba bilong ol dispela ailan inap olsem 5,000 manmeri na tu sampela moa ol i no kaunim ol yet.

Mi toktok long dispela bikos mi wok long wanpela kaunsil eria na long dispela wanpela ailan long Milne Be Provins namba bilong dispela kaunsil eria em inap olsem 10,711 na ol i gat kaunsil bilong ol yet. Olsem na mi tingting long en.

Plis ol wantok mi laik yu mas strongim tingting bilong mi. Yu husat laik putim moa tingting, putim tasol na mi ken ritim. Mi bilong ailan, tasol nau mi wok long Normanbi ailan long Dobu kaunsil eria long Milne Be Provins.

J.M. Francis Franzy, Esa'ala/M.B.P.

Morobe

Laik brukim provins

Dia Edita - Mi raitim dispela pas bilong bekim toktok bilong Mista Kuni Bibily long Arawa, Not Solomons Provins i bin rait i go long Wantok Niuspepa, primum kamap long mun Oktoba 7, 1978.

Insait long pas bilong em i bin toktok long "Brukim Morobe Provins", na toktok long ol pipel i sindaun long hap bilong Not Kos i mas helpim tingting bilong em long bruk na kisim provins bilong ol yet long lukautim ol yet.

Brata hia i tok olsem, Nesenel Gavman na Provinsal Gavman i save putim ai i go tumas long helpim wanpela sait na i no tingting long ol arapela hap.

Yes brata, mi laik bekim liklik tok olsem: Morobe Provins em i no save lusim tingting long ol sab provins bilong en long wanem samting ol pipel i laikim na askim.

Brata, mi wanpela bilong Morobe Provins nau mi wok insait long Port Moresby Siti na lukim wanem samting Nesenel Gavman i trai hat long mekim kantri bilong yumi i sanap strong. Olsem ol sab provins yu bin kolim Not Kos, Finschhafen, Kabwum, na Kindiu, em olgeta i ples maunten olsem na gavman i hat long wokim ol bikipela rot na kamapim ol dispela provins.

Sapos yu laik bruk lusim Morobe Provins, yu ting yu i gat inap ol mansave bilong wok insait long Provinsal Gavman opis bilong yu na mekim plen long wanem ol wok laik kamap long provins?

Mi tokim yu brata, ol toktok bilong yu i bin mekim em no gat gutpela as tok olsem na bihain moa yu no ken rait i go long Wantok long lusim nating taim bilong yu.

T.P. Walter, Port Moresby.

Saten Hailans

Minista krosim ol wantok

Mista Wiwa Korowi, em i Minista bilong Helt, tasol i helpim Minista bilong bosim ol telipon na radio na lektrik pawa na ol samting olsem. Em i krosim ol wantok bilong em tru long Saten Hailans klostu long lalibu.

Long dispela hap P en T i gat wanpela liklik stesim long salim tok bilong telipon i go long olgeta arapela hap bilong kantri. Klostu olgeta wik ol pipel i go stilim wara na kaikai, gavman i bin putim long dispela liklik haus bilong ol wokman bilong P en T ol i save fiksime ol masin bilong telipon.

Nau gavman i kros long dispela kain pasin bekim

bilong ol pipel. Em gavman i hatwok long lusim mani na peim wokman nating. Mista Korowi i tok olsem, sapos ol pipel i no pinisim dispela pasin, bai gavman i no moa fiksime ol telipon bilong ol long dispela hap. Na tu gavman i no laik mekim go het moa yet wok telipon, bai ol Saten Hailans i ken toktok gut wantaim ol arapela hap bilong kantri.

Ol saveman i bin painimaut olsem: i no gat wanpela kantri i gat gavman i liklik tumas. Oltaim gavman i save go bikipela bikipela moa. Pasin bilong em.

Is Nu Briten

Gavman westim planti

Mista Martin ToVadek, memba bilong Gazelle, i bin tokaut olsem: Ol rot long hap bilong Rabaul i nogut tru tru. Dispela i mekim transpot bilong ol pipel i hatwok tru. Ating bai gavman i mas lusim sampela handet tausen kina bilong stretim ol gen.

Long tingting bilong mi, as bilong dispela wari em i nesenel wok atoriti tasol. Em i no laik wok gut wantaim provinsal gavman long Rabaul. Na tu dispela dipatmen i no save mekim gut wok bilong em. Olsem nau ol pipel i mas lusim planti takismani long stretim dispela wok dipatmen i no bin mekim.

Mista ToVadek i tok, em i bin raun long planti hap bilong kantri, tasol em i no bin painim ol rot i nogut olgeta olsem ol rot long hap bilong Rabaul. Wantaim moa em i putim hevi long pablik wok atoriti long Rabaul na i tok ol wokman i no save wok gut wantaim long opis bilong en, na ol i wet longtaim tumas bipo ol i stretim ol rot.



Poto antap i soim Francis Rea, em wanpela skaut lida bilong Kimbe i sindaun toktok long wailas wantaim sampela skaut long PNG na long ol arapela kantri. Long Sarere, 21 Oktoba ol skaut i kibung long olgeta hap na i toktok long wailas. Samting olsem 150 skaut long Port Moresby i bung long gaden bilong Gavana Jeneral na i toktok wantaim ol skaut bilong ol arapela kantri.



THE INVESTMENT CORPORATION OF PAPUA NEW GUINEA



SAPOS YU SMAT, YU BAIM SEA LONG INVESMEN KOPORESEN BILONG PAPUA NIUGINI

Bai yu kisim winmani bilong planti kampani wantaim.

Sapos yu laik save moa, o yu laik kisim fri wanpela kala buk i soim wok bilong mipela, yu rait long: Investment Corporation
P.O. Box 155
Port Moresby


Nem bilong yu:

Adres bilong yu:


Wanpela opisa bilong Invesmen Koporesen i kaunim bikpela hip mani wanpela papa bilong tretstua long bus i bin bringim bilong baim 1500 sea long Invesmen Koporesen.

Aveling Barford Pacific Pty. Ltd. Representing the world's leading automotive manufacturers.

Ume St. Gordon, Port Moresby. Phone 257166, 257908
Morobe Ave. Lae. Phone 424188, Mt. Hagen. Phone 521015
Stones Automotive Services, Kieta. Phone 956093
Malaguna Motors, Rabaul. Phone 921751



RYCO-FLEX
Hydraulic hose, assemblies,
couplings, adaptors.



NACHI

Bearings—automotive industrial machinery. Roller, ball, taper bearings.
Extra small radial ball bearings.
Single row deep-groove ball bearings.
Double-row self-aligning ball bearings.
Tapered roller-bearings.
Cylindrical roller-bearings.




PES BILONG OL MERI



Tupela poto long dispela pes i soim sampela meri bilong felosip grup bilong Yunaitet Sios long Tokorara/Port Moresby i sindaun mekim wok bilong ol long samapim bilum, wokim basket long karuka, samapim klos, na wokim olkain samting olsem long han bilong ol yet. Ol yet i bringim ol lip na tret samting bilong mekim dispela wok.

Olgeta Fraide em i de bilong ol meri Tokorara i kibung long mekim sampela pre na bungim liklik mani bilong helpim ol gutwok bilong Yunaitet Sios bilong ol, na tu long mekim dispela kain wok long han bilong ol. Ol mani ol i winim olsem, ol i putim long beng na ol i save yusim bilong helpim ol tarangu i stap nabaut olsem skwata long Moresby. Na ol i helpim Ret Kros tu. Olgeta wan wan sios bilong Moresby i gat kain felosip olsem.



Tin Mit Sup

Ol samting yu mas i gat:

- 1-pela tin mit
- 1-pela drai kokonas sampela kumu sol
- 1-pela liklik spun plaua

Rot bilong wokim:

1. Skrapim kokonas. Wokim gris bilong em na putim i go long sospen.
 2. Wasim na katim kumu, na putim i go long sospen tu.
 3. Putim liklik sol.
 4. Putim sospen long paia inap kumu i tan liklik.
 5. Opim tin mit na katim mit i go liklik. Putim mit i go wantaim kumu na larim i stap inap kumu i tan olgeta.
 6. Sapos yu laikim sup i strongpela liklik, orait putim wanpela liklik spun plaua i go long liklik kol wara na bihain putim i go long sospen na tanim olgeta wantaim.
- Sapos yu i gat pis yu ken kukim olsem mit.

Link take-up lever for perfect stitching.

Automatic bobbin winder.

Stitch length lever and reversing control.

Drop feed for darning and embroidery.

PREN BILONG YU INAP OLTAIM





Strong Tru.

HUSKY DYNA

Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.

TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

ELA MOTORS LIMITED

MADANG 82 2188

RABAUL 92 1988


KIETA 95 6083

WEWAK 86 2255

GSP ET 013P

BOROKO MOTORS

SAPOS YU GAT WOK-TINGIM FORD



Yu ken lukim nupela FORD TRAKTA long BOROKO MOTORS long olgeta hap bilong Papua Niugini. Na tu yu ken baim long Arawa Motors, na Sepik Engineers, na long Kimbe Bay Shipping, na Highlands Heneni Goroka, na Higatura Motors Popondetta.



OL MEKENIK BILONG
MIPELA INAP FIKSIM
FORD
LONG OLGETA HAP

Mipela i gat planti spea pat na mekenik.

BEKIM TOK BILONG MINISTA

SIMBU WARI LONG OKUK

Dia Edita - Mi wanpela man bilong Simbu yet, mi tisa, na nem bilong mi UAI NINAKA. Mi gat liklik wari na mi laikim askim yu long givim mi liklik hap rum long Wantok Niuspepa long putim sampela wari bilong mi.

Wari bilong mi i go olsem long taim Nesnel Ilek-sen i bin kamap long Simbu Provins long yia i go pinis. Imbake Okuk i bin kisim mi wantaim sampela man bilong blok long Kideng Kondopina long taim bilong Nesnel Ilek-sen long antap long trak bilong em. Na em i askim mi long votim em na mi i no wet, nogat. Mi kirap na votim em.

Na long dispela taim mi no gat tingting long wanem, bikman bilong mi long trak bilong em na mi amamas na em tu i kirap na baim moa moa bia na mipela i spak nogut tru. Olsem na mipela i no ting moa olsem mipela i bin makim vot bilong mipela pinis nogat, mipela i spak nogut tru na mipela i amamas tasol long makim namba tu vot long em gen.

Na nau mi kirap nogut long harim Imbake Okuk i traim long bagarapim sindaun bilong mipela ol Simbu na i luk olsem em i laik bagarapim tru sindaun bilong olgeta manmeri na pikinini bilong dispela nupela nesene PNG.

Yes, brata lambake

Okuk, mi wanpela bilong yu yet, mi laik tokim yu olsem: Yu lusim tingting long mipela rabis manmeri bilong Simbu. Mipela i bin makim yu namba wan laon taim bilong ileksen. Na nau yu ting wanem long mipela Simbu manmeri i bin makim yu long wokim bisnis na pulimapim poket bilong yu tasol? Na yu lus tingting olgeta long mipela. Ating mobeta yu memba bilong mipela long Simbu Provins yu mas tingting gut nogut mipela bai painim yu long bihain taim. B.Y. Uai Ninaka, Simbu Provins.

PAWA BILONG PIPEL

Dia Edita - Sapos ol memba i laik senisim gavman ol i mas askim yumi ol pipel pastaim. Bikos pawa i stap long yumi. Ol memba ol i no sanap long laik bilong ol na ol i kamap memba long palamen. Yumi ol pipel yet i votim ol na ol i kamap memba.

Tasol bilong wanem ol memba i no tingting bek long yumi ol pipel ol i laik senisim gavman long laik bilong ol. I luk olsem ol memba i pait tumas long pawa na kisim bikpela pe long poket bilong ol na ol i lus tingting long yumi ol pipel long dispela kantri Papua Niugini.

Ating yumi olgeta pipel i bilip long gavman bilong tude. Taim yumi kisim selp gavman na yumi kisim

independens i no gat blut i kapsait long kantri bilong yumi.

Sapos wanpela pati i laik kamap gavman i mas wet pastaim long narapela ileksen bai i kamap bihain. Mipela olgeta pipel i les tru long harim redio na lukim na Wantok long senisim gavman.

Senisim gavman bilong wanem tru? Ating i luk olsem yupela ol memba i pait hat tasol long kisim pawa na pe na kina. Na yupela lus tingting long mipela ol pipel i olsem dok i luklukim ol man i kaikai. Nau mi laik askim. Yupela ol memba i sanap long laik bilong yupela o ol pipel yet i votim yupela? Plis bekim na bai mi save.

Andrew Taroa, Kimbe.

ASKIM PLIS MINISTA

Dia Edita - Inap yupela i givim spes long mi na bai mi ken autim wari bilong mi. Mi gat wari olsem gavman i no save helpim ol meri na pikinini bilong ol plisman taim meri na pikinini bilong plisman i dai long narapela provins. Em gavman dipatmen em nau save helpim tarangu plisman long baim balus tiket na salim indai man o bodi i go bek long ples bilong dispela plisman. Em plis dipatmen em nau save mekim olsem.

Taim plisman i dai em dipatmen save baim balus tiket na salim dispela bodi



i go bek long ples bilong em tasol, olsem wanem long meri na pikinini bilong plisman. Em olsem wanem? Yupela ting plis dipatmen i mekim gutpela pasin long ol wokman bilong em? Mi ting em i no gutpela pasin. Olsem na mi laikim plis minista man lukluk long ol kain wari bilong ol plisman.

Sapos nogat, Orait, salim go bek long ples bilong ol yet na taim ol kisim kain trabel olsem pikinini i dai em isi tru long ol i ken planim bodi long as ples bilong ol yet. Sapos nogat, Orait, apim moa pe bilong ol maritman. Taim nogut olsem ol yet i ken baim balus tiket na salim bodi i go bek long ples bilong ol yet. Ol singel plisman em i orait. Taim ol i kisim sik o painim indai em dipatmen

i ken salim bodi i go bek long ples bilong ol yet. Dispela kain pasin mi lukim long Arawa na mi raitim dispela pas.

Dispela plisman em i wokman bilong gavman. Olsem na gavman mas helpim meri na pikinini bilong plisman. Taim nogut save kamap em plisman yet baim balus long dispela bodi na tu em yet baim tupela balus tiket long go long ples na kam bek long wok.

Man, em olsem wanem? Wokman bilong gavman, em gavman mas helpim wokman bilong em.

Em tasol wari bilong mi. Husat man laik skruim nek orait, salim i kam tasol long Wantok Niuspepa.

Aipinimada Parage, Arawa/Not Solomons

TAMBU TORO

TAMBU TORO LUKIM OL MERI PILAI RAGGI.



OLAMAN.... OL MERI PILAI RAF TRU OLSEM OL MAN TU, YA..



DISPELA KAIN MERI ATING BAI IGAT MOA STRONG. BAMBAI MAN BILONG OL I HAMBAK BAI OLI AUTIM OL GUT TRU YA.


SCHEDULE EFFECTIVE 29TH OCTOBER 1978 - ISSUE No. 26

Schedules shown in this timetable are based on the latest information available at the time of going to press and are subject to alteration without notice. All times shown are local times. Flights carried out by B707, B747, F-28 and F-27 aircraft. **International flights are shown in bold type.**



	MONDAY			TUESDAY			WEDNESDAY			THURSDAY			FRIDAY			SATURDAY			SUNDAY											
	FLT	DEP	ARR	FLT	DEP	ARR	FLT	DEP	ARR	FLT	DEP	ARR	FLT	DEP	ARR	FLT	DEP	ARR	FLT	DEP	ARR									
Boeing	PX010	0605	POM-LAE	0650	PX011	0730	POM-KOJ	1300	PX001	0930	POM-SYD	1410	PX008	0045	MNL-POM	0745	PX002	1050	SYD-POM	1330	PX001	0730	POM-SYD	1210	PX010	2325	HKG			
	PX003	0930	POM-BNE	1220	PX012	1415	KOJ-POM	2125	PX004	1530	SYD-BNE	1550	PX003	0930	POM-BNE	1220	PX005	1445	POM-BNE	1735	PX004	1330	SYD-BNE	1350	PX004	1440	BNE-POM	1730		
	PX003	1310	BNE-SYD	1530	PX007	2045	POM-MNL	2345	PX007	2045	POM-MNL	2345	PX003	1310	BNE-SYD	1530	PX006	1840	BNE-POM	2130	PX004	1440	BNE-POM	1730	PX009	1840	POM-HKG	2300		
	PX002	1650	SYD-POM	1930																										
					</																									

Maxell Helpim OI



Maxell bateri i stap long olgeta hap.
Taim yu go long stua yu mas askim long Maxell tasol.
Maxell i no inap pinis kwik. Em bai i stap longtaim tru
...Maxell

Kisim Maxell bateri tasol



GSHM03

ASKIM NA BEKIM

Baim kot

Dia Edita - Nau mi gat liklik wari long autim em i olsem. Planti hap long PNG sampela pipel i kisim sampela kain liklik trabel. Na ol plis o gavman i save sasim ol long baim opis long liklik mani olsem K50 o K25 samting.

Hia long Bougainville wanpela man i kisim wanpela liklik trabel ol plis o gavman i save sasim em long bikpela mani olsem K100 o K200 na sampela taim inap long K400 o K500 samting.

Tru o gutpela long gavman i sasim bikpela mani tasol ol wokman i no save kisim bikpela mani olsem K100 o K200. Sampela save kisim daunbilo long K100.00. Ol wok long sevim mani long bihain taim tu. Long helpim papamama, pikinini na ol wantok tu.

Mi pilim olsem em i no gutpela pasin bilong yupela i tru. Yupela i gat rait

long sasim bikpela mani tasol yupela i katim nek bilong mipela na i no gutpela.

Sapos husat man i laik sapatim mi, rait i go long Wantok Niuspepa na bai mi ken lukim. Tenkyu.

Pilyo James Lugipini,

Wabag/Enga

Dia Pren,

Plisman na gavman i no save makim pe bilong baim opis. Em jas tasol i mekim. Na em i save skelim planti samting. Ating i gat wanpela skel bilong baim wan wan sas na jas i bihainim dispela.

Sapos jas i lukim wanpela man i rabis, orait, em i ken makim liklik mani long baim kot. Tasol sapos em i lukim man i gat planti mani, em inap makim bikpela mani.

Yu komplek bikos man i lusim kot, i no gat inap mani na em i mas kisim long ol wanlain na wantok. Yesa, pren, wok bilong kot em i no bilong

mekim isi bilong wanpela man i brukim lo. Nogat. Em i mas pilim. Maski em i wanem kain man. Hevi bilong brukim lo em i no samting nating, olsem natnat i kaikai skin bilong yu.

Yunaitet fran

Dia Edita - Mi gat liklik wari long askim yupela. Inap yupela tokim mi long dispela samting, ol i save kolim olsem: "Highlands United Front",

(1) Em i minim wanem samting tru?

(2) Em i save wokim wanem kain wok?

(3) Husat i bosim dispela wok na wanem dipatmen i bos long en?

Em tasol askim bilong mi. Olsem mi laik bai yupela mas printim long Wantok Niuspepa na bai mi yet wantaim sampela man i no save bai kisim save taim ol i ritim dispela hap tok bilong en na i minim wanem samting.

Em tasol Wantok Niuspepa.

Timothy Simeon,
Gerehu/Port Moresby.

BEKIM

"Highlands United Front" - Hailans Yunaitet Fran em i wanpela politikal pati, i wankain long Yunaitet Pati. Em i bin kirap long dispela yia tasol, long taim ol sampela man insait long Yunaitet Pati i laik rausim lida bilong en, em Sir Tei Abal. Hetman bilong dispela nupela grup em Mista Iambakey Okuk, memba bilong Simbu Rijonal ilektoret.

Dispela nupela pati i laik bungim olgeta memba bilong palamen i stap long hailans bai ol i ken vot wantaim na taitim bun bilong mekim hailans i go het. Ol i save tok na ting, Hailans i win long namba bilong pipel insait long en, tasol planti man bilong Hailans i no kisim bikpela

wok insait long gavman. Na ol i strong long stretim dispela samting.

Dispela Hailans Yunaitet Fran em i pati bilong oposisen bilong gavman nau. Em i bin traim pinis dap-saitim gavman bilong Michael Somare na Julius Chan. Tasol ol i no inap. Tupela bikpela man bilong ranim dispela pati em Mista Iambakey Okuk na Roy Evara.

Hamas God?

Dia Edita - Plis yu inap long putim askim bilong mi long Wantok Niuspepa.


Long dispela taim i gat moa long 600 sios raun long wold. Na mi laik save tru hamas God tru i stap long Heven?

Sapos i gat wanpela God Papa wantaim Jisas na Holi Spirit, orait yumi mas mekim wanpela trupela sios, o mekim wanpela lotu tasol na mipela mas

(i go moa long pes 16)

TOM PIPER MIT

i klostu moa, i gutpela tru



Sapos yu laikim kaikai i swit moa na i redi hariap tru, baim wanpela tin Tom Piper mit. Sapos stua i klostu, Tom Piper tu i klostu.



**PUTIM MANI BILONG YU LONG BENG BILONG PAPUA NIUGINI STRET
EM NAMBawan HAUS MANI BILONG YU**

WINMANI BILONG OL MANI YU PUTIM LONG BENG

Yu mas putim moa long K300 long beng bipo em i ken wokim winmani. Sapos yu larim i stap sotpela taim tasol, bai winmani i no planti. Tasol sapos yu larim longtaim, bai profit i go antap.

Sapos mani i stap	Winmani bilong yia em i.
3 mun	4½% (pesen)
12 mun	6% (pesen)
2 yia	6¼% (pesen)
3 yia	6½% (pesen)

(Pesen em i min hamas toea winmani yu kisim long wan wan kina. 6% i min, yu winim 6 toea long olgeta K1 i stap long beng. Olsem man i gat K300 em bai winim K18 kina winmani long yia.)

**SAPOS YU LAIK PUTIM MOA OLSEM K100,000 INSAIT LONG BENG, BAI YU
KISIM SPESEL WINMANI**

(Ring long Mista Mangelsdorf 21.1999 na bai em i tokim yu.)

ASKIM NAU. MIPELA I GAT 33 HAN BENG NABAUT LONG PNG.

LONG PNG BENG MANI BILONG YU NO KEN LUS OLTAIM EM I WIN

Laik stretim konstitusen

Praim Minista, Mista Michael Somare, i tok save pinis long kaunsil bilong em i bin makim 11-pela pipel long stap insait long wanpela spesel komisin bilong senisim sampela hap bilong Konstitusen. Olsem bai Konstitusen i ken pas gut long kantri na pipel na pasin bilong ol.

Palamen yet i bin vot orait long bungim kain komisin olsem bilong stretim konstitusen na ol i ting bai long yia 1980 ol inap pinisim dispela wok. Palamen i bin makim samting olsem K500,000 bilong dispela.

Mista Somare i tok, ol memba i bilong ol kain kain provins, na kain kain pati, na grup, na wok. Na olgeta i lokal pipel tasol. Tasol em i no inap givimaut ol nem bilong ol inap em i kisim tok orait long ol na gavana jeneral.

Dispela komisin bai raun long olgeta hap bilong kantri na i toktok wantaim ol pipel bilong painimautim ol tingting bilong ol long ol hap bilong konstitusen. Konstitusen em i as lo bilong kantri; olsem em i bikpela samting tru. Dispela lo i mas stret na i mas gutpela.

17 Nupela PSA opisa

Pablik Sevis Asosiesen, em bikpela yunion tru bilong ol gawan wokmanmeri, i bin pinisim ileksen bilong em na hia mipela i givim nem bilong ol 17 het opisa bilong en: Presiden: Mista Jack Karukuru. Vais presiden: Mista James Mileng.

Ol narapela opisa: Mista Napoleon Liosi, Mista Esau Reuben, Mista Iamo Nou, Mista Martin Dino, Mista Francis Posanau, Mista Nicholas Natera, Mista Gorua Gomara, Mista Mathias Pohai, Mista Pius Sankin, Mista Karo Vali, Mista Opa Taureka, Mista Wilson Ephraim, Misis Delma Boden, Mista Arnold Smare, Mista Michael Kendi.

Sitisen komiti

Minista bilong Foren Afeas, Mista Ebia Olewale, i bin makim dispela 4-pela man bilong Sitisensip Komiti: Mista Sam Tulo, (memba bilong Not Bougainville Open) Mista Matiabe Yuwi (memba bilong Tari Open), Mista Buri Kidu (seketeri bilong jastis), Mista Toni Siaguru (seketeri bilong Foren Afeas na Tret).

Wok bilong dispela komiti em i bilong raun long wan wan provins, we i gat sampela pipel i laik kamap sitisen bilong PNG. Komiti ya i bin go pinis na mekim wok bilong em long Morobe na Isten Hailans na Westen Hailans Provins. Na em i bin skelim na glasim 30 pipel i laik kamap sitisen.

Sapos ol i bihainim pasin bilong nupela lo, man/meri i laik kamap sitisen i mas wet inap 8 mun samting bipo em i kisim tok orait.

Minista bilong Leba, Mista Jakob Lemeki, i tok nau ol i laik wokim wanpela buk i gat nem na wok bilong olgeta faktori na woksap bilong PNG. Ating i gat planti kain samting yumi inap wokim long PNG stret, tasol planti pipel i no save long en. Ol faktori na bisnisman bilong ol ausait kantri tu i laik save long dispela samting.

Dispela haus bai stap olsem tasol inap planti yia moa, long wanem, ol anis i no inap kaikai Hardiflex faibro.

Hardiflex simen faibro i no save krungut, i no save sting, na i no save bruk isi, na yu no mas pentim.

Hardiflex faibro em i isi long yusim, i luk nais, na i no kostim planti mani. Em i samting tru bilong wokim olkain gutpela haus long Papua Niugini.



**JH HARDIFLEX
building board.**

Burns Philp (NG) Ltd. All Branches Steamships Trading Co. Ltd. All Branches Carpenters Hardware, Port Moresby New Guinea Co. Ltd. All Branches Gabriel Chow Sing Yip & Co. Rabaul. Bowmans (PNG) Pty. Ltd. Port Moresby & Lae. Bowmans Bodeco - Kieta



PES BILONG PIKININI



PIKININI I GAT RAIT LONG HELT

Wanpela bikpela lo bilong Yunaitet Nesens na olgeta memba bilong em, i dispela: olgeta pikinini bilong olgeta kantri i gat rait long gro na long abrusim sik. Bilong helpim ol pikinini, yumi mas helpim ol mama bilong ol - bai ol yet i gat gutpela klinik na kisim gut save long lukautim pikinini.

Olsem long planti nupela kantri ol gavman i bin statim samting yumi save kolim "infan welfe" - em i olsem pasin bilong lukaut bai ol bebi i gat strong.

Long planti planti kantri planti bebi i save dai long kain kain sik na tu long sik bun nating. Bipo long PNG tu i olsem tasol. Long taim bilong tumbuna moa long wan hap bilong olgeta pikinini i no bin kamap bikpela man na meri. Ol i dai taim ol i bebi yet. Planti pikinini tu i dai long taim mama i karim ol. Nau i no olsem long PNG. Tasol long planti arapela kantri i olsem yet.

Pikinini i mas gat gutpela kaikai. Sapos i no gat inap longpela taim, bai bodi bilong em i no gro, na kru bilong het bilong em tu i no gro gut. Na dispela kain man o meri i no inap gat gutpela save o inap tingting gut taim em i bikpela pinis.



BAIM T SIOT BILONG FAMILI



Naispela T siot i gat tok MI LAIKIM YU, WANTOK o NEW NATION. . . .

Bilong ol pikinini: K2.75 (sais 24, 26, 28)

Bilong ol bikpela manmeri: K3.00 (sais 12, 14, 16, 18, 20, 22, 24, 26)

Mi laik odaim:

Wantok T siot.sais

New Nation T siot.sais

Nem bilong mi:

Adres bilong mi:

Hia mi putim sek inap long K. bilong baim ol dispela T siot.

(Yu mas putim 21 toea moa long baim pos opis bilong wan wan T siot yu odaim.)

Salim i kam long: Wantok, Box 1982, Boroko.




Poto antap i soim Mista Josefpeter Kansy, man bilong makim Jemani long PNG, i sanap namel long ol MSC studen bilong Bomana seminari. Long nem bilong kantri bilong em, em i present long ol long ol yunifom bilong basketbal. Ol samting ya i kostim inap long K250. Ol seminerien i amamas na i tenkyu long Mista Kansy. Pater Andrew Pong, bosman bilong olgeta MSC Pater na Brata long PNG, em tu i stap long displea selebresen.

WOK BILONG PASUWE

Poto long raithan i soim seketeri bilong Pasuwe long Port Moresby i presen long wanpela spesel masin bilong stretim sampela kain sik bilong ai. Dispela masin i kostim samting olsem \$3,000. Dokta Roger Dethlefs (namel) em bai yusim dispela masin bilong wok dokta bilong em. Na man i sekan em i Dokta Marjen, man bilong bosim ol wok dokta long bikpela haus sik long Port Moresby.

Pasuwe em i wanpela bikpela kampani i gat bakstua long Moresby, Kawito, Kiunga, na Hagen na i ranim 30 stretstua long tripela provins. Olgeta profitmani dispela kampani i winim, i go long helpim olkain wok bilong Esia Pasifik Kristen Misin na wok helt, kalsa, na helt bilong kantri.

Long dispela yia Pasuwe i bin presen long moa olsem \$250,000 long helpim go het olkain gutpela wok.



HAMAS GOD

lotu lo. (i kam long pes 13)

i kam bek long kisim ol gutpela man na meri na pikinini, bai mipela go long nupela kingdom bilong heven wantaim Jisas.

Ating maski long mekim kain kain lotu na ol sios memba tu paul long bihainim wanem God i tru, lotu i tru. Sapos i gat wanpela God tasol, orait plis mekim wanpela lotu tasol. Maski brukim ol trupela 10-pela lo bilong God.

Na nau mi harim long sampela misin ol i save pris na tok long ol pipel. Yupela ken kaikai wanem samting i stap long dispela graun. Tasol yu mas bilip long God. Bikos God i wokim olgeta samting bilong kaikai tasol.

Na sampela misin i tok, i

gat tupela kain kaikai, sampela klin na sampela i no klin long dispela graun. So yu i no ken kaikai long kaikai we i no klin.

Na mi lukim sampela misin i tok, yu i no ken marit inap long painim dai bilong yu. Na sampela misin i tok yu ken marit bikos God i tok long Abraham na ol lain bilong em bai kamap olsem wesana bilong solwara na sta bilong heven so yu ken marit.

Na sampela misin i lotu long Sande na sampela i lotu long Sarere. Na mi i no klia long wanem misin i save bihainim trupela tok bilong God.


Sapos yu belhat yu rait i go long Wantok Nius.

Mista Jacket Tu,

(?)

VILLAGE EQUIPMENT SUPPLIERS

Bikstua bilong olkain masin na tul bilong wok didiman na wok kamda



MASIN BILONG KATIM KAUKAU I KAMAP OLSEM LIKLIK BISKET	K150.00
CINVA MASIN BILONG WOKIM BRIK	K315.00
MASIN BILONG RAUSIM SKIN BILONG KOPI (tripela kain	8.50
MASIN BILONG KATIM BIN SMOLPELA SMOLPELA.	3.50
MASIN BILONG KATIM MIT LIKLIK LIKLIK	5.70

Ol dispela prais i bilong stua bilong mipela long Lae. Sapos yu laikim wanpela lista i gat nem bilong olgeta kain masin na tul samting mipela i gat long stua, orait, yu rait o ring i go long Menesa:

Micah Kusak,
Box 2172, Lae.
Telipon: 42.4902.

BAIM WANTOK

Sapos yu laik kisim Wantok niuspepa olgeta wik inap long wan yia stret, yu salim nem na adres bilong yu wantaim K8.00 i kam long:

WANTOK BOX 1982 BOROKO

Long go long Australia em i K14.00.

Long Yurop na Amerika: K18.20 (long sip)

K 24.00 (long balus)

STORI BILONG TUMBUNA

MANKI TRIKIM MASALAI

Bipo, bipo tru. Wapela boi i bin i stap wantaim lapun tumbuna mama bilong em long wanpela ples. Long maunten bilong dispela ples wanpela masalai tu i bin i stap.

Wapela taim dispela boi i kisim banara na spia bilong em na em i tokim tumbuna, yu stap. Bai mi i go painim ol pisin bilong mitupela. Em i tok olsem na em i go pinis long bus. Taim em i wokabaut i go. Em i paul long rot na i wokabaut bihainim rot bilong masalai man.

Em i wokabaut i go na em i lukim wanpela liklik blakpela pisin i pas long haus bilong spaida. Em i sori long pisin, olsem em i kisim dispela pisin na holim.

Em i wokabaut i go moa yet na em i bungim dispela masalai na askim em, "Lapun papa, yu kam long wanem hap?"

Na masalai i tok: "Mi painim abus bilong mi. Na yu i kam we?"

Na boi ya i tok: "Mi painim pisin bilong tumbuna."

Pinis na masalai i askim boi gen, i spik: "Yu ting yu hap man long sut long banara?"

Na boi i tok: "Yes".

Pinis na masalai i tok gen: "Mitupela bai traim masel. Husat bai tromoi ston i go antap tru." Pinis, na boi i tokim masalai long tromoi pastaim.

Masalai ya i kisim ston na i tok olsem, "sapos ston bilong mi i go antap moa yet, bai mi kaikaim yu. Na sapos bilong yu i go antap

Masalai ya i kisim ston na i tok olsem, "sapos ston bilong mi i go antap moa yet, bai mi kaikaim yu. Na sapos bilong yu i go antap moa yet, bai mi lusim yu i go".

Em i tok olsem pinis na em i tromoi ston i go antap. Tupela wet i go na ston ya i pundaun i kam daun gen.

Pinis, em i tokim boi olsem, "taim bilong yu nau". Na boi i tromoi pisin em i bin i stap long han bilong em i go antap.

Tupela i wet longtaim

tru na pisin ya i no kam bek. Na masalai i lusim boi i go long ples bilong em.

E. Conneber,
Finschhafen.



TULTUL TITAN



ARC-TITAN Pty. Ltd. P.O. Box 1026, LAE. Tel. 42.3988.

PAS I KAM LONG OL PIPEL

JOINIM AMI

Dia Edita - Mi i gat wanpela wari hia na mi laik bai yupela prinim long Wantok Niuspepa.

Wari bilong mi i go olsem. Gavman bilong yumi long PNG i mas kisim ol skul liva long joinim ami. Bihain mi raitim wari bilong mi. Pastaim wanpela man laik wokim nupela gaden na em i wokim nupela banis olsem pik i no ken i kam insait. Sapos olgeta banis i holim strong pik i no inap i kam insait long gaden. Olsem tasol ami i olsem banis bilong kantri bilong yumi. Sapos ami i no i stap kantri bilong yumi bai inap bagarap.

Olsem na gavman bilong PNG i mas lukluk long dispela samting. Planti skul liva i stap nating long ol viles na taun na long haiwe rot na ol i wokim planti kain kain trabel.

Olsem na gavman bilong PNG i mas lukluk long dispela samting. Ami i banisim kantri bilong yumi i stap bai gavman i stap gut na ol bisnisman na ol kampani na ol misin tu wantaim. Yupela i ting planti trabel na stil save kamap long siti na taun. Em ol husat ol viles pipel ol skul liva.

Mi ting em ol skul liva tasol olsem na gavman i mas lukluk long dispela samting. Planti skul liva olsem standet sikis na fom foa ol i stap nating.

Em tasol wari bilong mi.
George Koskali,
Panguna/Not Solomons

PEN PREN BILONG WANEM?

Dia Edita - Mi wanpela katekis bilong Katolik Sios long Koge, Simbu Provins. Mi laik sapotim tok bilong Sista Virginia Stimer long Wantok bilong Sarere, 30 Septemba 1978.

Mi luk olsem long 1976 inap nau planti man long rida ol i save jeles na trikim sampela rida mi ting em i no stretpela pasin. Nogat tru. Olsem long pen pren, em i no min long marit.

Em i no min long mi pulim mani o samting bilong em. Nogat. Em i pren nating long bun wantaim man long narapela provins. O kantri long toktok wantaim.

Mi wanpela man bilong Sina Sina. Tasol mi no save wanem problem o samting i stap long nambis. Orait, nambis man tu i no save long samting i stap long hailans. Pen pren em i gutpela long toktok wantaim narapela brata o susa bilong yumi long narapela provins long bung wantaim na toktok wantaim.

Sapos wanpela man o meri long skul, o klap, o komyunit, insait long wanpela provins i mekim olsem, orait, olgeta i mas sutim ai na lukluk long dispela man insait long ples o skul o klap. Bambang em i pilim na em i no ken mekim moa.

Mi laik pinisim tok olsem em i no gutpela pasin long man i wokim olsem. Tenkyu.

Joe More,
Koge/Kundiawa.

SINGAUT LONG MERI

Dia Edita - Mi wanpela skul studen bilong Tigidu Komyuniti Skul long hap bilong Finschhafen, Morobe Provins. Yes mi gat liklik wari long wanpela pasin oltaim mi save lukim long taim mi kisim wan wik holide long Lae. Na mi lukim dispela pasin na mi pret.

Insait long Lae siti i gat planti man i gat save na planti i no gat save long het bilong ol. Long wanem? Taim ol i lukim ol meri i wokabout long rot ol i save singaut nating nating long ol. Tasol ol i no save dispela meri em i marit o nogat. Sampela bai ol i tok hei, mi gat laik long yu. Na sampela bai tok, he, yu go we bai mi kam? Na yumi go. Na sapos dispela meri i gat kros long dispela man. Bai dispela man i hatim em na i laik paitim em.

Sori tru. Mi laik tok tru na klaim tingting bilong yu husat man i save mekim pasin olsem. Long PNG

i gat planti man na meri i save tumas long pasin bilong waitman na pasin bilong tumbuna bilong yumi tu. Na sapos yu gat laik long wanpela meri.

Plis yu no ken singaut nating long pablik ples o long ai bilong ol planti manmeri. Yu mas i go klostu long em na askim em, sapos em i gat laik long yu. Planti yangpela meri i save sem long dispela pasin i no stret long tingting bilong ol.

Ating yupela ol man i mas senisim tingting bilong yupela liklik pastaim. Maski long tingting long botol tasol na mekim yu longlong oltaim.

Em tasol liklik wari bilong mi.

Mis J.S. Waema,
Finsch./Morobe

TRIKIM OL MERI LONG LUSIM PLES

Dia Edita - Mi save slip long Panguna na mi bin lukim planti Awio marit i pulap long wanpela haus. Sampela i gat pikinini na sampela i singel yet. Dispela samting mi bin lukim long ai bilong mi.

Taim ol klina na leba nambaut ol i go lip ol i save pulik sokis bilong ol na putim naispela siot, na kisim haus na kam kisim meri. Taim ol meri i harim ples Panguna. Maski lapun man, maski marit ol i save hangamap long ol. Na yupela i save baim tiket na kam long Panguna. Taim ol i stap long Panguna sampela marit haus i gat 3 o 4-pela maritman i slip long wanpela haus.

Taim ol i stap long Panguna sampela man bilong ol meri ya i save wok klina na wok leba olsem na sampela long ol meri i save ranawe long lusim man bilong ol. Long wanem namba wan taim ol i save tokim ol olsem, ol i save operetim ol bikpela masin. Na sampela i save tokim ol meri olsem, ol i wok long bikpela opis bilong kampani. Taim pe de i kamap ol i save opim pasel long hotel na no gat moa long baim kaikai na baim ol samting bilong meri na pikinini.

Olsem na sampela meri i save ranawe long man bilong ol. Dispela samting em i no gutpela pasin.

Sapos yu husat man i wok klina na wokim dispela pasin, orait, yu lukim dispela na no ken wokim gen. Yu man yu i gat tingting. I no ken ting olsem wantok i kisim haus na bai mi go kisim meri. Nogat. Wantok i no bosim laik bilong yu. Yu yet yu bosim laik bilong yu.

Sapos husat man i laik bekim hap liklik tok bilong mi, yu rait i go stret long Wantok Niuspepa na bai mi ken lukim.

Yalomale Bessa,
Panguna/Not Solomons

BEKIM LONG SINGELMAN

Dia Edita - Inap long yu givim mi liklik spes bai mi putim liklik wari bilong mi i go insait. Wari bilong mi i go olsem. Brata ya Koro Aketangil i bin rait i go long Wantok na tok em save lusim bikpela mani long ol maritman na bet long pati bilong ol. Brata, em yu bin tok stret na mi bin amamas long em.

Mi tu mi save lusim bikpela mani long ol maritman taim mi singel yet. Tasol ol i no save askim mi long mani na mi save givim ol long laik bilong mi. Na bihain mi i no save komplem.

Mi i no save givim mani nabaut long ol maritman we mi i no save long ol. Olsem na mi ting yu tu yu olsem mi. Yu i no save givim mani long olgeta maritman husat yu i no savelong em. Mi ting yu save givim mani long ol wantok bilong yu yet na bihain yu komplem gen na i no stret.

Sapos yu i gat wari olsem yu mas ranawe long ol o nogat; yu i go stret long ol lain yu save lusim mani na tok save long ol bai ol i bekim mani bilong yu.

Dispela pas bilong yu i soim mipela olsem yu wanpela stupit man i no gat het. Brata mi ting yu save

i go lusim mani long ol K5 kina long Toniva - Kieta na sutim nating long ol tarangu maritman long Panguna. Yu ting ol maritman i no gat mani tru? Mi ting yu wari tasol long ol maritmeri na yu rait i go long Wantok Niuspepa.

Orait mi tokim yu sapos yu lusim olgeta mani bilong yu long ol K5 meri long Toniva - Kieta na lus tru long mani, orait rait gen i go long Wantok o sapos nogat. Orait, yu wokabout tasol i kam antap long Karoona Marit Kota na bai mipela ol maritman i bungim 2- toea samting na bai mipela i givim yu.

P. Watts,
Panguna/Not Solomons

KAIN KAIN LIDA

Dia Edita - Nau mi laik autim liklik wari bilong mi long ol sampela hetman bilong lotu Katolik. Na mi wanpela wok leba bilong lotu katolik tu. Nau mi ken wokim eksampel long mi yet.

Olsem sapos mi peris o katiket, namba wan wok bilong mi em givim lotu o go pas long lotu long ol pipel. Olsem mi soim ol long "Pasin Katolik Pasin Marmari na Pasin Givim Bel".

Tasol mi katiket na wanpela bikman bilong Provinsal Gavman tu. Na taim mi kamaut long haus lotu mi tingim mi olsem mi wanpela lida bilong Provinsal Gavman tu hia. Orait mi lusim ol gutpela toktok mi bin yusim insait long haus lotu nau. Mi kirap kalabusim manmeri, tok kros, tok save sapos ol pipel i no harim tok bilong mi.

Taim Pater bilong mi i kam. Mi sutim nus bilong em long wokim lotu na bikmaus long singsing insait long haus lotu. Tasol God papa i lap long mi stret o mi giman?

Wok katiket em i winim wok bilong gavman na pe bilong God i winim pe bilong gavman. Bikos bihain long dai bilong yu bai God i givim yu long pe tru.

J. K. Mateelde,
Pomio.

OL TESTAMEN STORI

Wanpela Profet I Autim Tok

1 Samyuel
7:10 - 9:20

Hap namba 3

Samyuel i go lapun pinis nau, na ol bikman bilong Isrel i laik em i makim wanpela nupela king long ol.

SAMYUEL I BETEN GEN, NA BIHAIN,

GOD I LAIK BAI MI MEKIM OLSEM YUPELA BIN ASKIM. TAIM MI PAINIM PINIS WANPELA KING BAI MI SALIM TOK LONG YUPELA.



TUPELA TRIPELA DE BIHAIN SAMYUEL I GO HARIAP LONG BIKPELA DUA BILONG TAUN.

ASDE GOD I TOKIM MI OLSEM. TUDE BAI MI BUNGIM WANPELA MAN LONG DISPELA PLES NA BAI EM I KAMAP KING BILONG ISREL.



LONG DUA BILONG TAUN WANPELA YANGPELA MAN I WOK LONG PAINIM SAMPELA DONKI I LUS.

MI GAT WANPELA HEVI. YU INAP TOKIM MI; SAMYUEL I STAP WE?

MI YET MI PROFET SAMYUEL. YU NO KEN WARI LONG OL DONKI. OL I PAINIM PINIS. YU KAM LOTU WANTAIM MI. NA TUMORA BAI MI TOKIM YU LONG SAMPELA BIKPELA SAMTING GOD REDIM BILONG YU.




OLAMAN!
OLSEM WANEM?
WANEM AS BILONG DISPELA TOK?




Used by permission of the David C. Cook Foundation. Copyright 1973, David C. Cook Publishing Co. All rights reserved.

WANTOK SPOT PES



**YU
INAP
PAINIM
WANTOK
BILONG
YU?**



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.